

1235

范
太
史
集



詳校官庶吉士臣何道冲

檢討臣何思鈞覆勘

總校官進士臣楊懋珩

校對官中書臣嵇承志

謄錄監生臣蔣錦城

欽定四庫全書

范太史集卷四十七

宋 范祖禹 撰

皇族墓誌銘

右武衛大將軍寧州團練使贈襄州觀察使襄

陽侯墓誌銘

侯諱令龜字君寶彰化軍節度使舒國公惟忠之曾孫
萊州防禦使東萊侯從恪之孫武寧君節度觀察留後
魯國公世規之子母涇陽縣君和氏初賜名補右監門

率府副率歷右監門率府率右千牛衛將軍右監門衛
大將軍右武衛大將軍代州刺史寧州團練使侯幼聰
悟不為兒童戲惟喜筆硯長而好學魯公愛之不使治
他務惟令奉賓客掌詞翰魯公薨未禫而涇陽夫人棄
養哀毀幾滅性執喪五年無違禮生長富貴深以驕奢
為戒志行修潔不斲人知性仁愛不喜殺生婢僕有疾
必躬為拯療不適聲色好學不倦宗室稱之元祐五年
九月庚午卒年四十有四娶梁氏封和順縣君八男曰

子囊右內率府副率早卒曰子買卒贈蘄州防禦使蘄
春侯曰子贄左班殿直曰子賀三班奉職曰子賢曰子
贊曰子質曰子賁六女長適右班殿直李宗彞次適左
侍禁劉和卿次適右侍禁路志行次適涇陽縣尉邢希
古二人在室孫男三人女三人九年二月己酉葬河南
永安縣銘曰

惟古邦君荒墜厥緒侯不驕溢以守貴富附以韓魏猶
貴欲然凡厥子孫視侯之賢

楚州刺史本州防禦使楚國公贈奉國軍節度

使謚良僖墓誌銘

公諱世恩字君貺曾祖楚康惠王德芳太祖第三子祖

英國公惟憲考榮安僖王從式母

闕

某氏初賜

名補太子右內率府副率歷右監門衛率府率右千牛
衛將軍右監門衛大將軍右武衛大將軍梅州刺史熙
寧七年神宗命公以潮州刺史楚國公主康惠王之祀
正拜袁州刺史景靈宮奉安祖宗神御禮成以康惠繪

像恩遷雅州團練使今上即位授楚州刺史本州防禦使公幼有成人之量及長謙沖謹厚動循禮節居家孝友與人愷悌榮王之喪三年不入寢室不飲酒茹葷元祐元年兄崇信軍節度使世采卒公哀悼感疾二年四月乙未薨年四十有七贈奉國軍節度使謚良僖夫人宋氏封永康縣君八男曰令勳右武衛大將軍濠州刺史次早卒曰令璿右侍禁曰令勸曰令覲皆左班殿直曰令庠右班殿直早卒曰令瑀左班殿直曰令剔右班

殿直早卒九女長適故右班殿直宋安國次早卒次適
左班殿直范湍卒次適陳州司法參軍吳瓌卒次三人
早卒次二人幼孫男十二人子禔三班奉職子禔右千
牛衛將軍襲楚國公子襪三班奉職子襪早卒子祿子
稜子球子禮子琰子禪未仕二人幼孫女十人四人早
卒六人幼九年二月己酉葬河南永安縣銘曰

太祖洪支追王楚邦爰暨良僖啓楚故封禴祠烝嘗薦
其苾香龍衮桓圭以對先王於皇神宗敷睦繼絕列聖

在天繇繇瓜瓞公多孫子仁孝之祉乃公乃侯世奉楚祀

右班奉職妻安氏墓誌銘

君安氏開封人曾祖靖贈太子右內率府副率祖居簡
供備庫副使父巽左班殿直母馬氏歸宗室三班奉職
子瓔君在家孝于親順于長巧于女功及適趙氏事舅
如父母奉夫如長上內外親屬無不得其歡心平居下
氣怡聲未嘗忤物宗族每娶婦輒指為法式奉職官深

州君內治家事祭祀賓客必竭其力或捐脂澤奩具以
佐調急故奉職入官未幾衆翕然稱之元祐八年十二
月辛酉卒年二十有五一男一女皆幼九年二月己酉
葬河南永安縣銘曰

婦無攸遂是職中饋克相其夫以濟外事宜壽而天永
齋厥志

右監門衛大將軍贈博州防禦使博平侯墓誌

銘

侯諱令駟字希才永清軍節度觀察留後宣城郡公惟

和之曾孫寧國軍節度觀察留後宣城郡公從審之孫

右屯衛大將軍世仍之子母安福縣君潘氏初賜名補

右內率府副率歷右監門率府率右千牛衛將軍右監

門衛大將軍侯幼喪父號毀族人幾不忍聞當祭感薦

具之不豐約日費甘蔬糲以奉先祀如其志乃語人曰

某之願足矣事母以孝聞從師受書易好學不倦為詞

章雅麗清新美風姿善筆札隸字尤得古法娶朝散郎

劉革之女先卒貴戚求昏預言資送鉅萬侯曰娶妻以
為宗祀非為利也將再娶妻之妹或曰彼貧而陋侯曰
貧陋而賢此吾所速也將納采元祐二年四月丁亥卒
年二十有五一男曰子侃三班奉職一女在室九年二
月己酉葬河南永安縣銘曰

藝而有文宗子之秀天畀之明而嗇其壽惟其不享以
利厥後

右武衛大將軍舒州刺史贈明州觀察使追封

奉化侯墓誌銘

侯諱令愔字和叔彰化軍節度使舒國公惟忠之曾孫
武勝軍節度觀察留後韓國公從藹之孫均州防禦使
武當侯世宣之子母普寧郡太君張氏初賜名補太子
右內率府副率歷右監門率府率右千牛衛將軍右監
門衛大將軍右武衛大將軍舒州刺史性孝友厚重不
妄笑語居家謹嚴接人謙恭口不言人過失好讀書祁
寒盛暑不少怠為篇章操紙筆立成音律奕射之藝無

不通喜調人之急屬疾普寧夫人每往視之侯恐貽母
憂雖至困強怡悅未嘗言疾苦元祐二年三月丙子卒
於顯仁坊私第年三十三娶王氏闕壽縣君七男曰子
勤三班奉職曰子威右班殿直曰子隱三班奉職曰子
奎子暈餘皆幼三女長適三班借職鄭燎餘在室九年
二月己酉葬河南永安縣銘曰

言不訾毀無辱身兮力疾自悅恐傷親兮君子之行宗
室信兮慶則有餘在後人兮

右武衛大將軍光州刺史贈明州觀察使追封

奉化侯墓誌銘

侯諱令壺字聖輿彰化軍節度使舒國公惟忠之曾孫
定州觀察使博陵侯從質之孫右屯衛大將軍世鎮之
子初賜名補太子右內率府副率歷右監門率府右
千牛衛將軍右監門衛大將軍右武衛大將軍光州刺
史侯幼孤事母兄孝友性純儉治家如寒素者絕聲妓
之玩喜讀書為歌詩屢求試換外官不許元祐五年十

二月壬子卒年三十有六娶蘇氏封永安縣君一男曰
子伯三班奉職早夭五女長適三班奉職高去華次適
左侍禁劉佖餘在室九年二月己酉葬河南永安縣銘
曰

寵而能降富而能約惟孝惟忠必謂之學欲試其有訖
未及施用昭厥美刻此銘詩

右監門衛大將軍慶州刺史贈

闕

州

闕

使追

封遂寧侯墓誌銘

侯諱令劄字子思同安僖靖王惟正之曾孫同州觀察使馮翊侯從謹之孫安化軍節度使世覃之子母武昌郡夫人郭氏繼曰壽安郡夫人夏氏所生閻氏初賜名補太子右內率府副率歷右監門率府率右千牛衛將軍右監門衛大將軍元祐五年獻所為文召試有司入等加慶州刺史六年五月丁丑卒年三十有三侯弱不好弄澹然終日無所忤夙喪父哀毀如成人事嫡母及所生無違禮友于兄弟處閨門雍穆上下無間言篤志

好學未嘗以聲色自娛月入俸度所費外皆以市經史
購祖宗御書前代筆蹟畜異墨竒硯盈於篋笥為人美
鬚髯善嚴飾進退雍容可觀娶安氏封德安縣君三男
曰子琥三班奉職曰子操次幼三女長適假承務郎王
偃次在室次早夭九年二月己酉葬河南永安縣銘曰
玉隱于山珠潛于淵其美發外如人之賢惟侯之行不
晦亦顯刻銘于幽以勸為善

右監門衛大將軍贈登州防禦使追封東牟侯

墓誌銘

侯諱令賽字聖美同安郡王惟正之曾孫同州觀察使
馮翊侯從謹之孫安化軍節度使世覃之子母武昌郡
夫人郭氏繼曰壽安郡夫人夏氏所生閻氏初賜名補
太子右內率府副率歷右監門率府率右千牛衛將軍
右監門衛大將軍元祐六年五月丙戌卒年三十有二
侯夙喪父毀瘠如禮性沈毅寬厚寡言志樂清靜無他
好燕居為小室聚書史圖畫耽玩無斁善威儀進退容

止可觀好施予得俸祿以濟貧窮施浮屠無所愛卒之
日家無餘財娶任氏封崇德縣君二男曰子涼三班奉
職次早夭四女皆在室九年二月己酉葬河南永安縣
銘曰

惟侯之生居養不移偃仰一室耽玩書詩自視其身而
不耆老瘞詞于幽惟後之考

左班殿直妻呂氏墓誌銘

君呂氏開封人父師道東頭供奉官母張氏君年十七

適左班殿直士僅德州防禦之子事舅至孝宗族長幼
皆得其歡心勉其夫以學宮邸稱賢元祐七年六月丙
寅卒年十八生一男踰年亦夭九年二月己酉葬河南
永安縣銘曰

崧之下洛之許藏諸幽惟永固

保寧軍節度觀察留後東陽郡公妻仁壽郡夫
人李氏墓誌銘

夫人李氏祖漢瓊彰德軍節度使父文祖供備庫使夫

人年十五歸于東陽郡公宗辨宜于家和于族人富貴
榮溢自視欲然尤好修身養性之術每閱儒釋書欣然
有所得常勉東陽公以學東陽由是力于文皇祐中為
舉首召試禁中獨中高選熙寧初薨夫人持戒絕葷茹
澹泊縞素若將終身訓諸子孫以學繼東陽之業諸子
孫服其教菲飲食耽經史寤寐勤勞數年之業成於是
仲綰仲瑄仲緘士獲繼登科第遷優秩宗屬改觀以相
勸勵魏邸文學之盛由夫人之訓也仁宗時嘗召燕宮

中夫人同命婦特髻見上顧之曰宗戚近屬有德者固當異數若東陽家無宜碌碌以朝詔有司命改服自後以包髻入當時榮之初封金鄉縣君後以夫貴封德安郡君神宗時以積行之懿特封仁壽郡夫人元祐五年五月丁亥薨年六十有八至今宮邸言婦德之美可以為閨門軌範者以夫人為稱首男十六人曰仲富左率府率幼亡曰仲尋故羽林大將軍黎州團練使贈鄆州觀察使追封東平侯曰仲綰故台州防禦使贈武康軍

節度使追封崇國公曰仲瑄邠州觀察使曰仲絨右武
衛大將軍端州團練使曰仲沂右監門衛大將軍曰仲
琨右千牛衛將軍曰仲闔仲毅並右監門率府率餘七
人皆早卒女十九人長適殿直張從懋次適供奉官李
仲正次適侍禁王鎬次適左藏宋安道次續侍禁王鎬
次適奉職高烈次適侍禁石繼承次適殿直李士宏次
適假承奉郎周別餘十人皆幼亡孫男三十二人
右武衛大將軍濮州團練使士託右武衛大將軍汀州

刺史士陸右監門衛大將軍士純士愆並右侍禁士伴
士春士稹士冬並左班殿直士令士聰士琰士牽並右
班殿直一人未賜名餘十八人皆早亡孫女出適者八
人未出適者十二人餘皆早亡曾孫男二十二人不黨
右班殿直不諂不磷不溢不惑並三班奉職十二人未
名餘五人皆早亡曾孫女出適者一人未出適者十有
二人九年二月己酉從宣仁聖烈太皇太后之喪葬河
南永安縣銘曰

於穆夫人宗婦之賢有母之教蕃其子孫仁祖神宗異禮錫命凡厥有家宜視其慶

右監門衛大將軍榮州團練使妻金華縣君石

氏墓誌銘

君石氏洛陽人曾祖繼遠贈太尉祖熙政贈右屯衛將軍考中本供備庫副使兄中立參知政事君幼專靜不為嬉戲長適右監門衛大將軍榮州團練使仲奚入見賜命服以夫貴封金華事舅姑孝接親族恭教育子孫

均一榮州好學所友多賢俊君具膳飲致饋遺未嘗少
倦榮州試學士院為第一君有助焉元祐三年正月丙
辰卒年四十有三八男曰士綴右監門衛大將軍曰士
砮右侍禁第六第八皆幼四人未名而天七女長適右
班殿直馮安老次適右班殿直張采次適右班殿直楊
安惇第七尚幼餘亦早夭孫男九人曰不愠三班奉職
八人皆幼孫女五人皆夭九年二月己酉葬河南永安

縣銘曰

石氏自衛磻為純臣以及洛師世有顯人賢淑宜家宗子之門克成其夫施于子孫

贈華州觀察使華陰侯永安縣君陳氏墓誌銘

夫人陳氏曾祖堯咨贈太師尚書令兼中書令祖榮右衛尉少卿父知德尚書虞部員外郎母董氏今封仁壽郡太君其先閬州人自高祖秦國公顯遂居開封今為開封人夫人年二十二適宗室贈華州觀察使華陰侯世瑞封永安縣君既嫁六年而觀察捐館除喪未幾長

子右屯衛將軍令駟亦卒奉祿亦薄殆無以養給夫人
安于窮約處之不憂鞠育幼子令駟盡其勤愛棲居十
七年始終如一令駟既長以左班殿直監泰州稅乃迎
侍之官夫人教子有素故居職見稱薦者甚衆元祐七
年七月戊戌卒於官舍年四十有五二子即令駟令駟
也孫男三人曰子惇三班奉職其二幼孫女二人適進
士陳元均高公肅九年二月己酉葬河南永安縣銘曰
陳氏大家奕世冠冕以及夫人在家亦顯終養于子少

報為善

右千牛衛將軍妻李氏墓誌銘

君李氏開封人曾祖應機贈戶部尚書祖咸熙贈衛尉
卿父昭嗣君年十五適右千牛衛將軍士註事舅姑孝
而謹接幼少和而肅千牛有美才善為文章尤通音律
君聞其講誦書史留意翰墨則喜稍習聲樂則終日若
有戚容千牛嘉其志悉屏他好自力于學試有司中高
選君有內助焉元祐己巳六月甲子卒年二十有一生

一子早夭九年二月己酉葬河南永安縣銘曰
關雎之詩以婦人勉夫以正為道化之行如君之少而
能如此是可嘉也已

右監門率府率妻劉氏墓誌銘

君劉氏開封人曾祖仁罕贈太子太師祖謙保靜軍節
度使贈中書令考懷安供備庫使母長安縣君伊氏君
年十六歸右監門率府率仲軾率府不喜聲色而頗好
學君事舅姑夙夜不懈間斥奩具以佐率府與親賓遊

舅防禦病飲藥未愈君割股肉為粥以進防禦服之翼日而瘳上其事於宗正諸宮稱其孝元祐五年正月己丑卒年二十有二男長未名而夭曰士釵右班殿直一女幼九年二月己酉葬河南永安縣銘曰

截髮教子陶氏之母割肌愈舅趙宗之婦千載之後過者式墓

右千牛衛將軍贈左屯衛大將軍墓誌銘

公諱仲肩字聖稽漢恭憲王元佐之曾孫安遠軍節度

使同平章事密國公允言之孫巴州團練使祁國公宗說之子初賜名授右內率府副率三遷至環衛官元祐七年五月戊戌卒年三十有四贈大將軍公幼聰敏樂詩書無富貴之習事上以恭接下以禮兄弟聚居雍睦尤喜賑施急難皇族姻媾或非士族公常恥之父母察其意及昏為求公族得楊氏故中書令崇勳之孫女公既沒治家規範一不改其舊教諸子以善道宮中稱賢六男曰士顛左班殿直曰士隱曰士祕曰士朶皆右班

殿直二人幼未賜名五女長適三班奉職張昞一在室
三早卒九年二月己酉葬河南永安縣銘曰

詩歌魯侯壽母令妻屯衛有室其德克諧公雖早世子
孫保之

右武衛大將軍通州團練使贈洪州觀察使追

封豫章侯墓誌銘

侯諱令琮字子奇太尉中書令冀王惟吉之曾孫武寧
軍節度使楚國公守巽之孫鎮寧軍節度使開府儀同

三司遂國公世該之子母李氏南陽縣君繼母李氏壽
昌縣君侯性沈厚方二三歲出語輒驚人有老成之風
初賜名授右內率府副率歷右監門率府率右千牛衛
將軍右監門衛大將軍右武衛大將軍常州刺史以大
將軍領通州團練使遭母南陽縣君喪粥飲不入口三
日毀瘠追慕事父盡孝親教諸弟以經史勉之以學由
是諸弟皆以文學試換多為文資見稱于人侯長于詩
書好論語孟子老莊雖閒燕非法言不道出居外第俾

諸子接朝士通世務效官知所守久之復還宮邸感先
人棟宇而哭元祐七年六月己未卒年四十有九娶董
氏封蓬萊縣君三子曰子球三班奉職曰子瑛右班奉
直曰子道三班奉職四女長適左班殿直焦通次適進
士劉希顏二幼九年二月己酉葬河南永安縣銘曰
曾孫侯氏惟忠與孝克顯克承祖考之教俾其後人永
有則倣

范太史集卷四十七

欽定四庫全書

范太史集卷四十八
宋 范祖禹撰

皇族墓誌銘

贈左領軍衛將軍墓誌銘

君諱令逸冀康孝王之曾孫僖安公守巽之孫鎮寧軍節度使開府儀同三司遂國公世該之子初賜名補太子右內率府副率遷率府率性孝友謙恭好學刻意于書史文章將求試有司元祐元年七月辛未卒年二十

有二娶王氏朝奉郎子淵之女九年二月己酉葬河南

永安縣銘曰

陋巷之士易以成名公子公孫鮮克有聲惟君力學有志于古如適千里躋于跬步

右監門衛大將軍妻孝感縣君王氏墓誌銘

君王氏曾祖惟志左屯衛大將軍祖凱威武軍節度使贈太尉父大方西京左藏庫使嫁右監門衛大將軍令誠性惠和勤儉甚宜其家元祐元年閏二月己酉卒年

二十有三二男長不育次曰子孟三班奉職一女幼九年二月巳酉葬河南永安縣銘曰平二月巳酉葬河南王氏世將子歸公族胡嗇其年不畀遐福

右侍禁妻翟氏墓誌銘

君翟氏開封人曾祖藏之內殿崇班祖儀供備庫副使父元衡右宣德郎君幼端麗勤于女工組紉之事承順父母顏色無違年十五歸相孝定王孫成州防禦使之子右侍禁士掄事舅姑盡婦道從夫之官監武勝軍酒

稅元祐四年七月癸巳卒於官舍年十有九九年二月
已酉葬河南永安縣銘曰

翟氏自周世有顯人之子于歸早隕厥身

右侍禁妻鄭氏墓誌銘

君鄭氏世氏族少卿隨之孫女歸右侍禁令誦事舅姑
孝以勤從夫順而正雍容肅慎以禮自防娣姒稱其賢
元祐二年九月卒年二十有二九年二月己酉葬河南
永安縣銘曰

鄭本姬氏來歸公族如春之華其隕何速

左班殿直妻錢氏墓誌銘

君錢氏高祖吳越忠懿王曾祖惟演英國公祖晦贈定武軍節度使父景祥右宣德郎君年十五嫁宗室左班殿直令悻事舅姑盡婦道處閨門之內肅如也趙君伯叔兄弟最衆多君奉其長以敬待其幼以和下至婢妾皆得其歡心元祐四年六月戊申卒年十有七一女幼九年二月巳酉葬河南永安縣銘曰

錢自吳越納其山川女為宗婦珪組蟬聯既克有家而不永年

隨州觀察使漢東侯妻陳留郡君吳氏墓誌銘
夫人吳氏曾祖廷祚永興軍節度使追封燕王祖元慶
左羽林衛將軍父守仁西京左藏庫副使母華容縣君
高氏嘗夢羣女鮮服擁旌仗而至有一女跪拜于前父
占之曰必有女貴者及生室有紅光家人異之年十七
適故隨州觀察使漢東侯宗楷事舅姑盡婦道治家恭

勤節儉雖臧獲亦遇之以禮媵妾滿前無妒忌之行主
于慈愛有饋生者必有之而不忍殺歲放禽魚以萬數
輕財好施賑貧恤孤侯先娶崔氏有寡妹無子夫人待
之如已妹人莫知其非親侯薨夫人教子以義俾開閣
延賓客當世名士樂從之游故子孫以多才顯于宗藩
元祐八年六月庚午卒于春明坊之別邸年七十有四
九年二月己酉從宣仁聖烈太皇太后之喪葬河南永
安縣啓侯之窆而合諸墓男十有五人曰仲臯建州觀

察使曰仲俟卒贈密州觀察使曰仲參卒贈右屯衛大將軍曰仲暄右監門率府率曰仲廖右武衛大將軍文州團練使曰仲冉右監門衛大將軍寧州刺史九人未名而卒六女長適西京作坊使張扶封長壽縣君次適東頭供奉官杜宗弼封長安縣君次適內殿承制張瑛封福寧縣君次適左班殿直郭若一封福昌縣君次適左侍禁吳祥封仁壽縣君次適東頭供奉官婁嗣正封永康縣君孫男二十有四人士富右武衛大將軍榮州

團練使士極右武衛大將軍吉州刺史士儷右武衛大
將軍慶州刺史士鱣右監門衛大將軍士品故左領軍
衛將軍士晉右侍禁士贛右監門率府率士聞士許士
闈皆右侍禁士葆士堵士莅士悝士啞士愜皆左班殿
直士暇士濳士儻士侍士曠皆右班殿直三人未名孫
女十有九人長適左侍禁向正卿次適東頭供奉官陳
迪次適西頭供奉官康伸次適潤州司法參軍郭弼次
適左班殿直李端信次適右班殿直鄭造次適假承務

郎李垣次適三班奉職唐公彥次適假承務郎孫公宣
次適三班奉職劉璿次適三班奉職張珪次適三班奉
職孫思誠餘在室曾孫二十人不剛不器不怯不貪皆
三班借職不習右班殿直不求不憂不劇不愆皆三班
奉職餘未仕曾孫女二十有二人銘曰

宗子宗婦居天屬之貴享天祿之富所不足者為善所
可願者永年也如夫人之福祿壽考子孫衆多其為善
也可知矣

權孟州節度推官妻田氏墓誌銘

君田氏曾祖承謂贈左驍衛將軍祖紹淵贈右金吾衛
將軍父良佐西京左藏庫副使母旌德縣君趙氏君既
笄適馮翊侯之子孟州節度推官子櫟初君在提孩趙
君祖母柴夫人嘗謂其女旌德君曰我孫子櫟當娶此
女後柴夫人卒馮翊侯亦卒君父母以趙君孤幼欲求
昏它族察君意不可故卒歸趙氏是時趙君補三班奉
職未幾以詞學登科賜進士出身改授文資親族以此

多君隨夫寓于博州元祐六年八月卒於博年二十有一男女各一皆幼九年二月己酉葬河南永安縣銘曰鳳得其凰和鳴鏘鏘會日苦短別日苦長

右千牛衛將軍妻仙源縣君王氏墓誌銘

君王氏父詵文州團練使尚越國賢惠大長公主越國養君以為子君既長事所養禮敬不怠越國亦愛之如已出為擇良匹年十七嫁宗室右千牛衛將軍子綸入謝禁中神宗延問進止如禮言對詳而不華神宗嘉嘆

優賜金帛兩宮太后遣中使勞問皆有賜焉君事舅姑
孝睦夫族曲有禮意居務簡儉專誦釋氏書元豐八年
十月庚寅卒年十有九太皇太后賜錢十萬賻其喪一
男曰伯益二女皆早卒九年二月己酉葬河南永安縣
銘曰

英宗之女賢惠有聞女嫁宗子芝蘭染芬

右監門衛大將軍妻崇安縣君石氏墓誌銘

君石氏曾祖保吉太祖朝尚公主祖先普光州團練使

考繼勲左藏庫副使幼竒警能讀班大家女戒及筭聰
明和靜歸右監門衛大將軍士郵事皇姑彭城郡君盡
婦道執姑喪毀瘠性不妒忌能和其族人元祐三年七
月辛亥卒年三十有三三女二早卒季女生七年矣九
年二月己酉葬河南永安縣銘曰
石氏近世昏姻天屬以及其孫來嫁公族朱輪煌煌彤
管煒煒不克偕老中道而止

左班殿直妻吳氏墓誌銘

君吳氏曾祖均贈太子左清道率府率祖世安贈左朝
散大夫父沛左朝散郎母伊氏華容縣君天資聰慧柔
順善音律年二十歸原州防禦使仲防之子左班殿直
士專從姑齊安郡君入謁禁中賜霞帔服事舅姑孝接
娣如睦約于奉已至躬自澣濯元祐五年九月乙亥卒
年二十有二二女皆幼九年二月己酉葬河南永安縣
銘曰

有吳之先秦伯仲雍慶流苗裔以有延陵女嫁于宗命

服是膺早世而隕未克顯承

右監門衛大將軍妻壽安縣君張氏墓誌銘

君張氏曾祖永和贈太尉祖茂則入內內侍省都都知
寧國軍節度觀察留後父巽客省副使母壽昌縣君高
氏年十九適右監門衛大將軍士宥性靖淑聞于容止
奉祭祀無違禮其家宜之事寡姑朝夕不懈元祐五年
三月戊辰卒年二十有二一女早夭九年二月己酉葬

河南永安縣銘曰

瞻彼西陵祖宗之原葬從先后永固萬年

右監門衛大將軍妻孫氏墓誌銘

君孫氏曾祖可度祖成贈左監門衛大將軍父吉左金
吾衛大將軍母延安郡君費氏君幼孤鞠養于兄嫂敬
服姆教容止有聞年十六適右監門衛大將軍士愔事
寡姑盡婦道居家雍睦元祐六年九月辛亥卒年二十
有六三男早卒二女皆幼九年二月己酉葬河南永安

縣銘曰

西陵之原祖宗所宅葬從夫家是謂天屬

贈虔州觀察使南康侯墓誌銘

侯諱世掌字持正越懿王德昭之曾孫彰化軍節度使
舒國公惟忠之孫保寧軍節度使安僖公從信之子妣
富陽郡夫人孫氏所生母贈太寧縣太君徐氏初賜名
補右內率府副率累遷右監門衛大將軍右武衛大將
軍威州刺史光州團練使元祐七年九月辛丑卒年四
十有六侯性清約不以紛華盛麗為悅藏書滿室喜與

賢士游親舊急難畢力賙之九年二月己酉葬河南永安縣銘曰

與奢寧儉為禮之本好書日益好施日損汎愛親仁其道則遠

贈青州觀察使北海侯墓誌銘

侯諱士倬字子強信安僖簡王允寧之曾孫越州觀察使會稽侯宗敏之孫定武軍節度觀察畱後博陵郡公仲仍之子初賜名補太子右內率府副率累遷台州刺

史性謙約厚于族人處其事不啻如已事弟妹幼孤者盡力鞠育以至昏姻皆有成立宗室稱之元祐四年四月乙卯以疾終于正寢享年三十三娶曹氏封仁壽縣君一男曰不惕三班奉職三女長適何興宗次皆幼九年二月己酉葬河南永安縣銘曰

君子務本愛始于親幼吾之幼以及他人惟侯之行有志于仁

右千牛衛將軍妻崇德縣君郭氏墓誌銘

君郭氏曾祖慥海州司理參軍祖珪承奉郎父履祥年
十八適北海郡王之子右千牛衛將軍仲奩性淡素善
書禮勤孝盡婦道與夫相待如賓平居無戲言元祐七
年二月甲子卒年二十有一一女早夭九年二月己酉
葬河南永安縣銘曰

冀妻饁耨梁婦舉案幽人之正中不自亂家道尚嚴聖
哲所嘆

右武衛大將軍台州刺史妻仁壽郡君曹氏墓

誌銘

君曹氏開封人曾祖玳贈左屯衛將軍祖僅贈左驍衛
大將軍父諤贈左武衛將軍年十五適右武衛大將軍
台州刺史士儵治家循理常以奢僭為戒北海侯好義
君尤喜之撫諸幼御婢妾皆曲有恩意元祐五年正月
壬戌卒年三十有七一男曰不惕三班奉職三女長適
何興宗次皆幼九年二月己酉葬河南永安縣銘曰
曹氏勲族赫奕后家女適宗子儉而不華凡厥子孫毋

失之奢

欽州防禦使妻安康郡君柴氏墓誌銘

夫人柴氏世京師人曾祖禹錫贈中書令尚書令祖宗
亮贈太子太師父貽憲贈左驍衛大將軍母壽安縣太
君張氏夫人在家時事父母孝敬待人寬以和內外親
族無長少皆稱之既筭適欽州防禦使世表逮事舅姑
如父母皆得其歡心其待欽州循理而順以善相告欽
州亮直行已有方嘗曰夫人助我舅姑沒執喪哀毀平

居奉佛持齋多蔬食戒殺生賑施孤貧幾五十年終始如一初無疾病一夕勉欽州以自愛重守舊節教子孫元祐六年八月甲午卒年五十有八六男曰令佗右內率府副率曰令晶右內率府副率皆早卒曰令甘右武衛大將軍保州團練使曰令椿卒贈右領軍衛將軍曰令航右監門衛大將軍曰令泮右千牛衛將軍三女長早卒次適故侍禁李需次適侍禁張汝弼孫男十一人子平三班借職次子受未官子兆殿直子力奉職次七

人未官孫女四人長適奉職張宗璟次適奉職武咎二
人在室曾孫女二人九年二月己酉葬河南永安縣銘

曰

柴氏大宗作配于宗率婦之職性孝惟恭從夫之榮大
邦啓封慶在後人乃侯乃公

右監門衛大將軍贈洺州防禦使廣平侯墓誌

銘

侯諱士穎字濟叔濮安懿王之曾孫寧海軍節度使沂

國公宗詠之孫郢州防禦使仲山之子母臨安縣君王氏初賜名補太子右內率府副率三遷至所終官自能言至中性質和靜為兒戲必陳書帙筆硯七歲從諸父兄擇師友以經史自課日誦數百言及冠通大義為詞章清警藻贍王家故多前代名帖心想手臨為人書石刻以百數或報以珍玩却而不受風格整秀內融外潤恥為膏粱之飾頂破烏帽策款段馬日奉朝請出入閭巷人莫知其王孫也事母至孝屬疾恐貽親憂忍不治

者累月元祐二年九月丁丑卒年二十有五娶王氏男
女各一人九年二月己酉葬河南永安縣銘曰
濮國子孫衆多蕃行廣平好學亦樂為善純素之行雖
隱而顯

右侍禁妻劉氏墓誌銘

君劉氏曾祖永崇供備庫使祖允濟贈左驍衛將軍父
仲達供備庫副使母靖安縣君蔡氏年十七適右侍禁
士洞容質婉淑性識聰悟巧于女工通文史能為詩奉

舅姑孝事夫順族人稱之元祐四年七月戊寅卒年十九九年二月己酉葬河南永安縣銘曰
歸于王孫宜其室家三歲為婦壽胡不遐

右班殿直妻林氏墓誌銘

君林氏曾祖懋祖秀保捷指揮使父澤東頭供奉官母董氏適右班殿直子縉事舅姑孝與娣姒輯睦恭儉溫惠治家有法元祐八年七月丁亥卒年二十有六一男
早夭九年二月己酉葬河南永安縣銘曰

林氏之先問禮孔門名過泰山千古如存歸于公族不
享永祿壽夭自天云何其速

賀州團練使妻長安縣君侍其氏墓誌銘

君侍其氏曾祖某贈左千牛衛上將軍祖溥供備庫副
使父珩右侍禁適右武衛大將軍賀州團練使天水郡
公士雋事舅姑孝閨門雍穆無愠色怨言治家有常法
飲食衣服器皿不為華侈取適而已元祐元年七月已
巳卒年三十有七七男曰不溢右監門率府率曰不惑

右班殿直曰不愚不忤未仕餘皆早卒五女二早卒孫
男二人女一人九年二月己酉葬河南永安縣銘曰
婦之德惟中饋勤于家儉弗侈從西陵利後嗣

范太史集卷四十八

欽定四庫全書

范太史集卷四十九

宋 范祖禹 撰

皇族墓誌銘

左武衛大將軍貴州刺史妻渤海縣君高氏墓

誌銘

夫人高氏曾祖瓊贈太師尚書令中書令韓武烈王祖
繼和贈左金吾衛上將軍父遵武文思副使母李氏夫
人以元祐八年八月歸宗室右武衛大將軍貴州刺史

子騫十二月癸亥卒年二十有三夫人性惇惠在父母家柔靜而和巧于女工善筆札既嫁事舅姑如父母相夫以正而順誨子以義而慈貴州前夫人男女十八人夫人鞠育一如已出雖處室未易寒暑及卒男女號慕哀毀一如喪親妣焉五男曰伯應曰伯膺曰伯廣皆三班奉職曰伯慶曰伯產五女在室九年二月己酉葬河南永安縣銘曰

夫人之歸鳴雁始旦宛其沒矣歲律方晏有子十人愛

母無間

右監門衛大將軍贈蘄州防禦使蘄春侯妻長壽縣君杜氏墓誌銘

夫人杜氏曾祖彥鈞贈安化軍節度使祖贊皇城使父宗旦歸宗室故蘄春侯子買封長壽縣君性慧巧善治家事舅姑孝接親族和雖媵妾遇之必以禮居侯家儉若寒素之族衣服不喜華侈厭逐遊觀之樂侯以賢稱于宗室夫人有內助焉侯卒夫人居喪如禮不飲酒茹

鞏元祐八年六月庚申卒年二十有九三男曰伯璵早
卒二人幼三女在室九年二月己酉葬河南永安縣銘
曰

杜氏之先世出陶唐嬪于宗子佩玉鏘鏘蚤世而隕令
問不忘

三班奉職妻安氏墓誌銘

君安氏開封人曾祖靖贈太子右內率府副率祖居簡
供備庫副使父巽左班殿直母馬氏歸宗室三班奉職

子瓔君在家孝于親順于長巧于女工及適趙氏事舅
如父母奉夫如長上內外親屬無不得其歡心平居下
氣怡聲未嘗忤物宗族每娶婦輒指為法式奉職官深
州君內治家事祭祀賓客必竭其力或捐脂澤奩具以
佐調急故奉職入官未幾衆翕然稱之元祐八年十二
月十八日卒年二十有五一男一女皆幼九年二月已
酉葬河南永安縣銘曰

婦无攸遂是職中饋克相其夫以濟外事宜壽而天永

齋厥志

贈開府儀同三司昌國公妻同安郡君安氏墓

誌銘

夫人安氏京師人曾祖解州防禦使習祖左侍禁懷正
父東頭供奉官承祐母李氏年十七歸宗室昌國公仲
駢事舅姑謹肅治家有法待內外親屬無貴賤長幼一
以禮雖遇婢妾亦未嘗大聲色故無不得其歡心故和
義郡夫人昌公之繼母也夫人奉之愈加敬順未嘗以

纖介致異昌公事繼母亦以孝聞人以為有內助焉既而公先夫人捐館夫人執舅姑及公之喪哀毀盡禮戒子孫必以慈儉為稱首子孫服其教訓循以為法累封同安郡君元祐七年四月壬午卒年五十有六九男曰士感右武衛大將軍渭州刺史曰士齒右內率府副率曰士趨左班殿直曰士勿右班殿直曰士頌右班殿直卒四人早夭女二十人適左侍禁劉鉉供備庫副使張從厚西頭供奉官葛世明承務郎劉公佐三班奉職王

審方二人幼十三人皆早卒孫男五人不求三班奉職
不愚右班殿直不惑三班奉職二人幼孫女三人二早
天一人在室九年二月己酉葬河南永安縣銘曰

澗溪沼沚潢汙行潦筐筥錡金蘋蘩蕝藻夫人是職公
侯之宮著為壺則繼彼國風

右侍禁妻張氏墓誌銘

君張氏世京師人曾祖玉贈中書令兼尚書令祖者贈
太師中書令兼尚書令父舉一左藏庫使母任氏封永

安縣君君天資勤儉志于女工父母愛之歸宗室右侍
禁士普歲時祠享饋奠必盡恭敬禮如事生宗族稱焉
奉姑孝謹治家和柔從夫官於汜水元祐四年七月壬
申卒於官舍年二十有四一女幼九年二月己酉葬河
南永安縣銘曰
惟張氏遭遇獻后仁祖之世寵祿盛大子孫衆多昏姻
公族宜矣降年不永其命也夫

右班殿直妻陳氏墓誌銘

君陳氏閬州人曾祖省華贈太師尚書令兼中書令秦國公祖堯佐相仁宗贈太師中書令兼尚書令鄭國文惠公父象古右宣德郎母陸氏繼母鄭氏君幼穎悟長而端麗巧于女功奉順母教未嘗有違母有所怒君在傍必移而為喜其言如不出諸口家人未嘗聞笑語之聲適宗室右班殿直子明冀王之後也以孝敬為舅姑所愛族人莫不宜之元祐七年三月丙申卒年二十三二女皆幼九年二月己酉葬河南永安縣銘曰

有媯之後國為陳氏鄭公文孫來嫁宗子方華而隕如
彼桃李

右武衛大將軍贈華封觀察使追封華陰侯墓

誌銘

侯諱仲湍字行可魏恭獻王元佐之曾孫平陽懿恭王
允升之孫武寧軍節度觀察留後彭城郡公宗厚之子
母王氏同安郡君繼曰曹氏壽安郡君初賜名補太子
右內率府副率歷右監門率府率右千牛衛將軍右監

門衛大將軍原州刺史風儀秀偉神氣惇實幼不好弄
讀論語孟子通大義既長服膺儒術覃思經典英宗惠
宗室不學增教官立課式俾日試月考由小學升大學
簡不率教者損俸以懲之侯夙夜勤勵率常中選神宗
以經術取士侯治易及周禮大宗正以名聞兩試秘閣
不中第遂不復舉徧讀歷代史氏諸子百家之書間為
歌詩雜著以見志神宗大興太學教養多士侯以宗室
不可無學圖立宗子學立升進法條上之會西師興不

報天子朝饗太廟侯以司尊相灌鬯禮成因論周官尊
彝作上中下三篇奏之屢欲試吏事齟齬不得施乃絕
意于仕教二子力學試有司中選元豐二年魏邸災侯
力負所蓄經史以出室無了遺徙居京城之西北隅門
無車馬之跡與兄弟和樂闢軒於序南手植叢竹作篠
軒記以志焉日以詩酒自娛初與教官侯溥遊甚款密
溥死累年因過其墓作詩以弔之又與進士劉克敦為
布衣交克敦死哭之於墓為哀詞十章宗室稱其善交

元祐二年正月己巳卒年三十有七娶劉氏封永康縣君六男曰士宇以文學中選為左承議郎曰士浥試亦中格為侍禁曰士洋殿直曰士嶸曰士隆曰士庖皆殿直五女長適殿直張燾次適借職高秩三尚幼孫男女十六人九年二月己酉葬河南永安縣銘曰

英宗勸學侯入鼓篋神宗造士侯出挾策雖雖在宮肅肅在廟公子信厚邦國之教

前右監門衛大將軍墓誌銘

君諱令駢太尉中書令冀王惟吉之曾孫陳州觀察使
淮陽侯守約之孫鎮江軍觀察留後北海郡公世靜之
子母襄陽郡太君張氏繼母壽光縣君慕容氏元祐五
年十月癸丑卒年二十有九娶徐氏永寧縣君五男一
女九年二月己酉葬河南永安縣銘曰
厥祖考惟公侯厚其終掩諸幽

左班殿直妻翟氏墓誌銘

君翟氏開封人曾祖藏之內殿崇班閤門祗候祖儀供

備庫副使父元弼西頭供奉官母皇伯彭城郡公宗厚
之女君幼喪母鞠于父性至孝卓然有立父命主閨門
之事家人裕如也及長適母兄故華陰侯仲邁之子左
班殿直士隆事姑謹而敬治家嚴而理相其夫以正而
順中外族人稱之元祐八年十二月壬申卒年十有六
一女曰馮奴九年二月己酉葬河南永安縣銘曰
君出自趙歸為宗婦才華而隕何夙不莫

右監門衛大將軍贈博州防禦使博平侯墓誌

銘

侯諱令屹字子固贈昭信軍節度使英國公惟憲之曾
孫贈金州觀察使新興侯從郁之孫贈洺州防禦使廣
平侯世芬之子初賜名補太子右內率府副率歷右監
門率府率右千牛衛將軍右監門衛大將軍元祐四年
五月甲申卒年二十有八侯幼而老成及長篤學治詩
書襁褓喪父所生母劉氏適人侯及冠始知之訪求無
所不至俸入罄其所有慶弔人事皆絕期以知存沒而

後已元祐三年得其母迎入宮晨昏定省竭力致養乃
有生意寢食始自安宗族稱孝娶張氏封壽安縣君三
男曰子確三班奉職二人并女皆幼九年二月己酉葬
河南永安縣銘曰

昔唐德宗亂失其母轍跡四海沒身弗覩惟侯克孝終
得其親凱風寒泉今有令人

三班奉職墓誌銘

君諱子皓字商老贈萊州防禦使東萊侯從恪之曾孫

贈武寧軍節度觀察留後魯國公世規之孫右武衛大將軍貴州刺史令卞之子嫡母樂平縣君徐氏所生母王氏初授三班奉職幼不妄言笑既長能自擇所守有老成人之志燕居端肅如見大賓與人交必求勝己者事父母以幾微而諫亦無少忤其意接親族和順而有禮義內外莫不敬愛之十歲能為詩往往有驚人之句六經諸子百家無不該覽每旦未冠櫛手已執卷夜分猶聞書聲父欲室之闕登一第以為親榮譽不娶

也篤志于學過勤得疾事親素謹雖病未嘗去側父母
屢遣終不易其志也元祐七年正月癸丑卒年二十所
為詩賦雜文十五卷藏于家九年二月己酉葬河南永
安縣銘曰
英英公子被文華兮少而強學樂無家兮天畀之才生
有涯兮既冠而字命不遐兮

左班殿直妻李氏墓誌銘

君李氏開封人曾祖惟寶贈左驍衛大將軍祖宗旦西

京左藏庫副使父豫右侍禁母柴氏年十八歸左班殿
直士饒事舅姑孝敬嫁之明年姑病扶侍躬承湯藥灼
臂祈請數日而愈元祐六年六月辛亥卒年二十有一
一男一女皆幼九年二月己酉葬河南永安縣銘曰
婦道內夫家外父母家唯事舅姑孝斯可已矣降年不
永其命矣夫

右屯衛大將軍妻康氏墓誌銘

君康氏京師人曾祖琪左內率府率祖公元左侍禁閤

門祇候父德濟供備庫副使母長安縣君王氏適左屯
衛大將軍仲瞞不逮事舅事姑以孝聞元祐二年五月
丙子卒年三十有四三男曰士宰曰士透曰士喑並左
班殿直女二人皆幼九年二月己酉葬河南永安縣銘
曰

凡婦之行宜莫如孝姑慈而從古之善教子孫繩繩永
有則儆

左奉議郎妻旌德縣君彭氏墓誌銘

君彭氏京師人曾祖睿武昌軍節度使贈中書令祖再
問右千牛衛上將軍父崇一左藏庫副使母安福縣君
折氏年十八歸右內率府副率令珣君幼聰慧端靜精
于女功歲時為竒巧纖麗以獻中外尊親而自服用甚
質歸率府事舅姑勤敬所居隘狹幾不容足鄰舍未嘗
聞人聲率府以千牛將軍大宗正與教官偕薦補外官
召試祕書省換授奉議郎監滑州倉草場君治內益清
儉雅尚清素有儒者風元祐六年二月丙辰卒于官舍

年二十有八四男三早亡幼曰子砥三女皆幼九年二月巳酉葬河南永安縣銘曰

遠矣彭氏大邦之後歸于公族宗子之秀克成其家不
享眉壽

右屯衛大將軍妻安樂縣君陳氏墓誌銘

夫人陳氏其先泉州人自曾祖寧遠軍節度使文顓始
居京師今為開封人祖緩大理評事考承德東頭供奉
官夫人幼警悟未笄適右屯衛大將軍世倓事舅姑孝

謹撫育子孫下逮媵御莫敢不肅而皆得其歡心內外
親族貧乏者必調恤之親疏輕重各稱其情人無間言
屯衛在宗子中號為家法可稱者夫人內助預有力焉
元祐四年六月乙卯卒七男曰令休右金吾衛大將軍
成州防禦使曰令族右武衛大將軍高州團練使餘皆
卒女適內殿承制楊應善孫男女二十有三人曾孫男
女七人九年二月己酉葬河南永安縣銘曰
帝舜之後胡公國氏在齊為田苗裔實繁夫人宜家內

外雍肅以有子孫顯于公族

右千牛衛將軍贈左屯衛大將軍墓誌銘

公諱令綴字景炤贈彰化軍節度使舒國公惟忠之曾
孫贈宣州觀察使宣城侯從謹之孫貴州防禦使世怙
之子母大寧郡君邢氏初賜名授右內率府副率歷右
監門率府率右千牛衛將軍公幼不好弄舉止嚴重長
治書易徧觀先儒及近世名家義說擇其善者從之其
餘誦習不務博而貴精非終帙非嘗越視他書論語孟

子荀揚諸書皆能諷誦學李白歌詩沈傳師字書平居
靜掃一室文史筆硯列置後前正坐或竟日素樂施與
或以貧乏告則視其戚疎緩急而厚薄先後之甚者不
暇請于父兄或解衣乞之無難色性篤孝視父母色少
有不悅未嘗安寢已而見喜容必命酒自慶元祐二年
得疾大寧郡君素鍾念每來視公必自力冠櫛而興若
無所苦者囑兄弟以儉葬十一月壬申卒年二十有五
娶張氏二女在室九年二月己酉葬河南永安縣銘曰

事親色難子夏所聞力行有餘篤志典墳施不獲報早
隕厥身

右武衛大將軍慶州刺史妻德安縣君王氏墓

誌銘

君王氏高祖承行尚秦國大長公主贈尚書令鄭王曾
祖世隆贈尚書令祖克明昭州團練使父誨文思副使
君生于富貴天資淑懿長適右武衛大將軍慶州刺史
世勅事舅姑盡婦道治閨門以禮法奉祭祀敬而嚴恤

惇獨惠而均元祐四年十一月壬午卒年三十有九六
男曰令寅左班殿直次早亡曰令澶左班殿直曰令愼
曰令竿皆右班殿直次未賜名八女長適右班殿直季
珣次適三班奉職楊訓二早亡餘在室九年二月巳酉
葬河南永安縣銘曰
詩歌碩人宗族盛大惟君之貴赫奕內外雖不眉壽亦
顯不晦

右侍禁墓誌銘

君諱士燭字明叔濮安懿王之曾孫廣陵郡王宗誼之
 孫英國公仲論之子母建安郡君杜氏五歲授右班殿
 直濮王二王夫人祔園廟轉左車遷右侍禁少秀穎好
 學性純孝英公薨哀毀感疾而卒年二十寶元祐四年
 十一月己酉娶高氏闕祖闕在大夫之姪九年二月己
 酉葬河南永安縣銘曰

子野毀卒春秋哀之雖不勝喪君子懷之

左班殿直妻李氏墓誌銘

君李氏曾祖繼隆贈太師尚書令兼中書令楚國公祖
昭亮贈太師尚書令兼中書令追封崇國公父惟賞贈
右驍衛將軍母曹氏沂王之孫女年十五適淮康軍留
後沂國公之子右班殿直士澧君聰慧而安靜幼喪其
母深處房闈兄弟罕見其面既嫁事舅淮康孝敬衣服
飲食不務華侈見其夫好學則有喜色欲罄所有以助
之元祐三年十二月癸酉卒年十有六九年二月己酉
葬河南永安縣銘曰

父母后族舅夫天屬其新孔嘉其究何促

右武衛大將軍賀州刺史妻長壽縣君劉氏墓

誌銘

君劉氏開封人曾祖知信贈太師中書令祖承嗣皇城
使資州刺史父永壽三班奉職君柔順寡言好施惡殺
承上御下動循法則族人皆樂其有純德諸子雖幼切
于求師以教之常語其夫以子孫不立為衣冠之恥年
十五適右武衛大將軍賀州刺史士薦封長壽縣君元

祐三年十月甲午卒年二十有九二男曰不侮三班奉
職次幼三女長適李偉餘皆幼九年二月己酉葬河南
永安縣銘曰
不榮世祿以教其子賢母之行宜責彤史

贈曹州觀察使妻安康縣君王氏墓誌銘

夫人王氏開封人曾祖漢忠保靜軍節度使贈司空祖
闕政着州防禦使贈司徒父道恭慶州團練使贈明州
觀察使夫人幼端慧不為嬉戲既笄柔閒婉淑事父母

孝敬年十八歸宗室贈曹州觀察使濟陰侯世統封安
康縣君入見坤儀殿慈聖光獻皇后顧問家世夫人言
母永嘉郡太君李氏章懿皇后之姪也慈聖勞問久之
夫人性溫靜衣服飲食約而不華喜調中外之貧者事
姑如母友娣姒如同氣敬夫如賓主左右給侍未嘗見
其喜愠之色而皆得其歡心濟陰侯病且卒夫人悲泣
感疾敕諸子曰爾曹幼孤宜力學治身以無忘先王之
訓則吾雖死目且瞑矣諸子恭慎能如其教孳居十餘

年元祐八年五月癸未卒年五十男五人曰令香右千
牛衛將軍曰令儻內殿崇班次早卒曰令初左班殿直
曰令饒右班殿直三女長早卒次適潘棨次適王僅皆
三班奉職孫男闕人子鵠三班借職餘皆幼孫女五人
九年二月己酉葬河南永安縣銘曰

顯以世族嬪於宗室守義而教實惟母德子孫誥誥先
訓是則

欽定四庫全書

范太史集卷五十

宋 范祖禹 撰

皇族墓誌銘

右金吾大將軍濰州刺史充本州防禦使贈安

化軍節度觀察留後追封高密郡公墓誌銘

公諱令教字景脩曾祖惟忠彰化軍節度使舒國公祖

從質定州觀察使博陵侯考世京徐州觀察使彭城侯

母臨安郡夫人張氏初賜名補右內率府副率歷右監

門率府率右千牛衛將軍右監門衛大將軍右武衛大將軍環州刺史左武衛大將軍成州團練使右金吾衛大將軍維州防禦使公少聰敏善屬文通五經諸子百家無所不觀蓄書數萬卷美風儀洞曉音律好讀晉史慕嵇叔夜阮嗣宗之為人閒居座右多植修竹每援絃賦詩超然有遺世之志然尊賢樂施常若不及奉身端潔治家簡儉元祐五年四月庚子薨臨終戒諸子以不能終養為恨年四十有四著詩書大義十卷歌詩集十

卷娶郭氏故參知政事贄之曾孫封德安縣君先公一
年卒九男曰右監門衛大將軍子雲曰右班殿直子思
曰三班奉職子泰曰子才餘皆幼女十人長適右侍禁
向子平次適右班殿直錢岵餘在室九年二月己酉葬
河南永安縣銘曰
博陵之孫彭城之子敏而好學世濟其美振振信厚時
如麟趾

安化軍節度觀察畱後高密郡公妻德安縣君

郭氏墓誌銘

夫人郭氏曾祖贄中書令襄國文懿公祖紹昇光祿卿
父肅之母陳氏夫人適安化軍節度觀察畱後高密郡
公令教性靜專愿順歷三十年其終如初門中無愠色
無怨言治家有常法其飲食器皿雖不豐侈而必精以
昔其衣無故新澣濯縫紉而必潔以完其語言周旋容
止進退必從容以和元祐四年三月壬午卒年四十有
四九男曰子雲右監門衛大將軍曰子思右班殿直曰

子泰三班奉職曰子才餘幼九女長適右侍禁向子平
次適右班殿直錢岵餘在室九年二月己酉葬河南永
安縣銘曰

易在中饋婦無外事詩美鵲巢德如鳩鳩起家而有可
配公侯夫人宜之是以似之

秀州刺史充本州防禦使贈保寧軍節度使追

封昌國公墓誌銘

公諱世享字公壽太祖四世孫也曾祖德昭越懿王祖

惟忠贈彰化軍節度使舒國公父從謹贈宣州觀察使
宣城侯嫡母薛氏高平郡夫人育母張氏以公貴封寧
國縣太君初賜名補太子右內率府副率歷右監門率
府率右千牛衛將軍右監門衛大將軍右武衛大將軍
達州刺史右羽林軍大將軍文州團練使沂州防禦使
今上即位遷秀州防禦使公幼樸茂不羣宣城愛之九
歲喪父號毀如成人長嗜學治詩書論語孟子通大義
熙寧中學官薦公明經可召試會有制宗室不許舉而

許自列公不欲蘄進然為學不已間為詩以自樂躬訓
子弟督責嚴甚故家庭遵尚禮義肄習學業為宗藩所
矜式精于書札善射藝性孝友敦睦輕財喜施事高平
夫人盡禮寧國君初喪英宗遣內人奠慰自是宗子育
母死內人致奠自公始居心喪晨夕定省憂戚未嘗見
于色容恐失君母之意退就異宮則哀苦備極以訖喪
期故高平愛之如已出高平之喪哀毀過制遣子姪上
表願守散至卒哭詔許之及葬在道稍遇險阻必躬自

扶匱仁宗山陵仲兄均州防禦使世祥從葬子幼穉未能任事著令許命婦送葬會其妻病不能往公四上奏請行詔特從之其後許弟護葬自公始燕居大書積陰德三字揭之座隅其撫養教督濟贍族屬之孤遺唯恐不至凡衣食之用凶嘉之費皆仰給焉故人丁淳之女失身于人公以財購出之又辦資裝擇良家子嫁之族人
有疑事必咨公公為處畫如已事無不中節善與人交久而益厚喜賓客多蓄名書畫筆硯紙墨遇朋友親

舊把酒相樂推誠無間故士多稱愛之元祐元年二月
癸亥卒年四十有七病革遺命教戒諸子託後事于弟
貴州防禦使世恬或勉以餽粥藥劑可愈公曰死生命
也其逃乎計聞天子賻卹甚厚贈保寧軍節度使追封
昌國公謚曰良恭娶錢氏封金城縣君吳越王之後供
奉官隆祐之女先公二十六年卒十三男曰令禔右武
衛大將軍文州團練使次未名而夭曰令誑曰令咥並
右侍禁曰令精曰令疑曰令諧曰令龔並左班殿直曰

令椽曰令柱並右班殿直一未名而天十六女其壻奉
議郎胡仔右侍禁張宗傑三班奉職馬縉右班殿直郭
永璋承務郎李大中三班奉職董臬呂執中李塾向慤
劉蒙三人在室餘天適郭氏呂氏者皆卒孫男十六人
子琦三班奉職卒子琬子琳早卒子玃右班殿直子玗
三班奉職餘皆幼孫女八人曾孫男女各一人九年二
月己酉葬河南永安縣銘曰

翼翼昌公孝友溫恭簡于帝衷善積厥躬其生也榮其

沒也令公多子孫天錫之慶

右武衛大將軍處州刺史妻壽光縣君王氏墓

誌銘

君王氏曾祖貽永贈尚書令兼中書令祖道卿贈右領
軍衛上將軍考彭年左藏庫使妣李氏崇德縣君年十
六適右武衛大將軍處州刺史士健事姑盡禮溫恭朝
夕無少懈勤于家事凡十七年如一元祐七年九月戊
子卒年三十有二六女一早卒九年二月己酉葬河南

永安縣銘曰

有崧維嶽有洛維川永固其藏於萬千年

右千牛衛將軍妻永和縣君張氏墓誌銘

君張氏其先河東人徙居開封曾祖延貴贈左衛上將軍祖宗益工部郎中贈朝請大夫考修遠奉議郎母壽昌縣君趙氏君純粹燕婉淑慎溫恭未笄適右千牛衛將軍仲疇封永和縣君性樂詩書尤喜屬文元祐五年三月丁卯卒年三十有二一子曰士燕曰士矚皆左

班殿直曰士諤曰士代曰士靡皆右班殿直次二未名
其四未名而天一女在室九年二月己酉葬河南永安
縣銘曰

張氏自晉歸于本朝昏姻天屬令問宣昭其華早落其
實椒聊

右武衛大將軍榮州團練使贈徐州觀察使彭
城侯墓誌銘

侯諱仲雪字潔已韓恭懿王元偓之曾孫相孝定王允

弼之孫彰信軍節度觀察留後北海郡公宗制之子母
文安縣君柴氏初賜名授太子右內率府副率歷右監
門率府率右千牛衛將軍右監門衛大將軍右武衛大
將軍瀛州刺史榮州刺史榮州團練使侯性夷淡嗜學
至忘寒暑北海公藏書萬卷教育諸子侯以通經一試
于有司不中選遂不復舉為詩多警句日飲斗酒不以
家事屑意事母以孝聞與諸弟友愛居喪哀毀至性過
人元祐八年八月己丑卒年四十有一娶宋氏朝請大

夫惠國之女封永昌縣君五男曰士壁左班殿直曰士
漾右班殿直餘未名六女其壻池州司理參軍劉寔右
班殿直潘稟餘幼侯月受奉錢十萬一妻一妾而處室
沒之日家無餘財九年二月己酉葬河南永安縣銘曰
孝定賢王北海好書侯克承之亦有名譽在後之人無
忘厥初

右侍禁墓誌銘

公諱令緄字景武贈彰化軍節度使舒國公惟忠之曾

孫宣州觀察使宣城侯從謹之孫今貴州防禦使世恬之子母大寧郡君邢氏所生石氏初賜名授右班殿直遷左班殿直右侍禁幼好學誦書日數千言長而治易博通先儒及近世名家義說喜唐人詩諷誦不廢寢食燕語必及之故宗族朋友皆樂與之游性復好施人以急見抵解衣與之家雖屢空晏如也年二十始調監富國倉門在官專以賦詩自遣既罷吏惜其去遮留終日乃得歸授京西巡轄馬遞鋪未赴元祐五年四月丁酉

卒年二十有五娶王氏一男三女皆幼九年二月己酉
葬河南永安縣銘曰

孔惡飽食博奕猶賢況于言詩樂以窮年道未之思夫
何遠焉

贈左領軍衛將軍墓誌銘

君諱士觀字公會贈鎮江軍節度使郇國公允成之曾
孫贈武寧軍節度觀察留後宗嚴之孫原州防禦使仲
防之子母齊安郡君石氏初賜名授右內率府副率遷

右監門率府率性醇素敦謹事親竭力奉已務儉元祐二年七月己巳卒年二十贈左領軍衛將軍娶張氏西京左藏庫副使禹錫之女三男長未名而夭曰不珪三班借職曰不燥未任一女在室九年二月己酉葬河南永安縣銘曰

厚於親薄于已為人子能如是全而歸可無媿

右屯衛大將軍妻平原縣君張氏墓誌銘

君張氏曾祖受益贈贊善大夫祖文炳殿中丞考用莊

左班殿直歸右屯衛大將軍令講屯衛羣從及諸父姑
姊當執婦禮以見者數十人君待以和敬一無間言屯
衛捐館既除喪君尚少父以其無子欲更嫁之君泣以
死自誓不許元祐元年正月乙巳卒年二十有八生一
女失之九年二月巳酉葬河南永安縣銘曰
共姜守義衛作柏舟如君之節乃宜公侯無愧死者往
從之遊

右屯衛大將軍妻崇德縣君張氏墓誌銘

君張氏父道周左侍禁適右屯衛大將軍令箋封崇德
縣君君夙喪父事母以孝聞既歸不及其舅事姑如事
母族人稱焉屯衛兄弟四人最處幼君常勉以悌由是
親愛益篤屯衛卒君嫠居不樂其生元祐元年宮中火
驚而感疾十二月庚申卒年三十男二人曰子賡三班
奉職次男及一女皆幼九年二月己酉葬河南永安縣
銘曰

伯姬火死諸侯畏宋君以駭隕亦惟義重凡婦之節沒

而為用

左班殿直妻杜氏墓誌銘

君杜氏曾祖正已蓬州錄事參軍祖宗敏贈太子左清
道率府副率父士言樞密院兵房副承旨年十九適康
州刺史仲弓之子左班殿直士珣君幼聰敏性質婉麗
巧於女功父母愛之求昏得公族事舅姑盡孝閨門肅
然元祐八年三月壬辰卒年二十有三一男三歲矣九
年二月己酉葬河南永安縣銘曰

杜氏后族派別流長嫁于宗支罔克壽臧銘以昭之俾
後不忘

右監門衛大將軍威州刺史贈徐州觀察使彭

城侯墓誌銘

侯諱令道字歸聖集慶軍節度觀察留後南康郡公惟
能之曾孫鄧州觀察使南陽侯從贄之孫保寧軍節度
觀察留後東陽郡公世復之子初賜名補太子右內率
府副率歷右監門率府率右千牛衛將軍坐罪非自犯

奪一官未幾復舊秩遷右監門衛大將軍威州刺史侯
性和裕未嘗失色于人力學好古熟漢唐史書善音律
多畜古器以為玩侍東陽公疾冠帶不去體居喪致毀
事母盡孝元祐四年七月辛卯卒年三十有二娶永和
縣君姚氏文思副使公綽之女繼室永嘉縣君王氏內
殿崇班悔之女二男曰子謹三班奉職次尚幼七女長
適三班奉職袁弼餘皆在室九年二月己酉葬河南永
安縣銘曰

君子之行不見聲色疇克能之惟侯可則

右監門衛大將軍贈博州防禦使追封北平侯

墓誌銘

侯諱令史字仲揚冀王惟吉之曾孫廬州觀察使廬江
侯守度之孫建武軍節度使嘉國公世括之子母彭城
縣君劉氏長樂郡君高氏初賜名補太子右內率府副
率歷右監門率府率右千牛衛將軍右監門衛大將軍
侯秀穎刻意于學無聲色狗馬之好宗族稱其孝友元

祐元年八月庚子卒年二十有八娶張氏封永康縣君
二男曰子欽右班殿直次二人及一女皆幼九年二月
己酉葬河南永安縣銘曰

善積于身宗族信之不永厥年亦未克施

左班殿直墓誌銘

君諱子建贈保寧軍節度使楚國安僖公崇信之曾孫
贈同州觀察使馮翊侯世登之孫右武衛大將軍榮州
刺史令羣之子母秀容縣君高氏以父蔭補三班借職

改奉職幼有成人之志不妄言笑從師受學樂讀書喜
筆札日誦數百言元祐七年六月辛未卒年十有三九
年二月己酉葬河南永安縣銘曰

揚氏童烏育而不茁懿懿宗子亦隕瓊瑤

右監門衛大將軍嘉州刺史妻永壽縣君程氏

墓誌銘

君程氏曾祖坦贈太師中書令兼尚書令祖戡宣徽南
院使武安軍節度使贈太師中書令兼尚書令父莘文

思使君幼端謹沈厚精于女功不喜華飾年十七歸遂寧郡王之子右監門衛大將軍嘉州刺史世設承上接下不失其宜侍姑疾夫婦衣不解帶宗族稱之性儉約治內嚴肅而能寬恕教諸子以孝友諸女以禮法元豐中封永喜縣君賜霞帔服元祐三年十月庚辰卒年三十有七六男曰令泌左班殿直卒曰令諶曰令愷曰令詒曰令玠並左班殿直曰令茨右班殿直六女長適三班奉職王誨次適三班奉職韓端仁次適三班奉職宋

克先次在室餘早夭九年二月己酉葬河南永安縣銘

曰

程氏近世執政之門教于公壺以適宗藩鵲巢之風麟
趾之配宜家有慶在其後裔

內殿崇班贈左領軍衛將軍墓誌銘

君諱士暉字和叔平陽郡王允升之曾孫滕王宗旦之
孫右屯衛大將軍仲寅之子初賜名令瑋補太子右內
率府副率本唐州防禦使世滋之子也元豐初出繼屯

衛改今名以學官薦換右職補外任改授西頭供奉官
監壽州酒稅未赴權勾當翰林司遷東頭供奉官內殿
崇班磁州兵馬都監元祐四年四月己巳卒于官年二
十有七君幼誦詩書嘉議論與之交者無不愛其材歷
官處繁劇強敏有餘薦之者十餘人初赴壽春請對得
上殿論當時利害數事神宗嘉之下其章有司面諭令
過郊禮而行乃命權翰林司娶張氏二男皆幼一女在
室九年二月己酉葬河南永安縣銘曰

神宗定宗子補外官之法故凡有一善必獎之所以長
育其才也聖意豈不遠哉

左侍禁妻范氏墓誌銘

君范氏京師人曾祖守斌贈左司禦率府率祖文玉內
殿崇班父滋累舉進士隱居自適君既笄歸于郢州防
禦使越國公之子左侍禁子閔性質溫粹儀度端雅喜
習筆札尤嗜書史事舅姑勤孝姑愛之如己女中外宗
族一無間言元祐四年五月癸未卒年二十有三三男

曰伯度次早夭曰伯庠一女九年二月己酉葬河南永
安縣銘曰

范本祁氏陶唐之裔嬪于宗子令儀婉懿宜其家人弗
克永世



范太史集卷五十